

# Powšitkowne WOZJEWJENJA

njedzelu, 24. septembra 2017

## Nyšpor z požohnowanjom konjacych zapřahow

Towarstwo Cyrila a Metoda, sekcija wěda a skutk, přeprošuje tež lětsa na wosebity nyšpor domchowanki z požohnowanjom konjacych zapřahow, ke kotremuž přijědže tež Drježdžansko-Mišnjanski biskop Heinrich Timmerevers. Nyšpor budže njedzelu, 24. septembra, w 14 hodž. w Chróscicach na łuce při Hatkach. Wosadni dujerjo jón wuhotuja.

## Jězba do Naumburga

Dekanatne dušepastyrstwo přeprošuje džěci 5. a 6. lětnika wot pónđzele do štwórtka, 9. do 12. oktobra, na jězbu do Naumburga. Wot kóždeho wobdžělnika zběra so přinošk we wysokosći 75 eurow. Zajimcy njech so hač do štwórtka, 28. septembra, we Worklecach pod telefonowym čisłom (03 57 96) 8 87 07 přizjewja.

## Wodženje po Krabatowej wustajeńcy

Zjawne wodženje z Hans-Jürgenom Schröterom, hłownym biografom Johanna von Schadowitza, po wosebitej wustajeńcy wo Krabaće budže srjedu, 4. oktobra, we 18 hodž. w Budyskim Serbskim muzeju. Jedyn z najdrohotnišich eksponatow móža zajimcy na tutym wječoru w originalu widžeć. Je to akwarel „Nastup wójska sakskeho kurwjercha Johanna Georga I. před Budyšinom 1620“.

Wodženju přizamknje so w 19 hodž. přednošk „Aus dem Leben des Johann von Schadowitz. Krabat der Oberlausitz.“, kotryž změje tohorunja Hans-Jürgen Schröter. Wón je so wjace hač džesać lět ze žiwjenjom von Schadowitza zaběrał a je dokładnje přeslědžił. Tež wšelake wažne dokumenty je wo nim namakał.

## Mandželski seminar

Přizjewjenja za přihot na sakrament mandželstwa wot pjatka, do soboty, 1. do 2. decembra, w Smochćicach přijimuju so pisomnje hač do srjedy, 8. nowembra, w Dekanatnym dušepastyrstwje we Worklecach. Formulary k tomu su w cyrkwjach wupožene.

## Eksercicije za Serbow

„Póšli swojeho Ducha a wobnowiš wobličo zemje... A tež mje!“ Pod tutym hesłom su tež lětsa zaso eksercicije za Serbow w Drježdžanach Wysokich Dubach, wot pjatka, 3. nowembra, wječora hač do njedzele, 5. nowembra, připołdnju. Wšitcy wěriwi ze serbskich wosadow su přeprošeni, so na tutech dnjach wobdžělić. Přizjewjenja přijimuju so direktnje w Haus HohenEichen Exerzitienhaus, Dresdner Str. 73, 01326 Dresden, info@haus-hoheneichen.de, telefonowe čisło (03 51) 2 61 64 10 abo w Chróscicach na farje pod telefonowym čisłom (03 57 96) 8 04 00.